

國朝駢體正宗續編

國朝駢體正宗續編卷六目錄

二十四斫齋銘

過庭錄序

黃霽青太守綠牋詞序

周縵雲茗邊填詞圖序

阮梅叔雷塘話雨圖卷跋

書徐隨軒韻紅樓曲圖卷後

翠竹軒後記

潘紱庭光祿山抹微雲館詞序

邢湖觀秋荷記

金陵陶桓公祠記

肇域志跋

與戴子高書

方仲堅墓誌銘

春水詞序

集夢窗詞

答汪蓮府昆季書

張棲竹先生棲竹圖序

薛慰農觀察江舟欸乃詞序

茗霄游記序

五湖煙艇題贈集序

何子貞學使游弢眉瓦屋詩草序

朱浣花遺詞序

送徐洽之返里序

寄孫琴西太守書

西山荷錨圖記

戴恭人權厝志

張玉珊行藥集序

國朝駢體正宗續編卷六目錄

國朝駢體正宗續編卷六

嘉興張鳴珂公束輯

二十四妍齋銘

姚燮

夫无膏外結上稟太陰之精青珖內胎下苞靈羊之瑞是以得石一尺抵之連城閱人百年昂于駿骨矧青赭屏列月星緯交抗米顛之洞天躋倪迂之清閼能不銘諸肺腑奉若尊彝林君子侯斐歲善辭綺豪工畫寢書猶枕耆古若苴顧眄籤軸養息心神四朽水綃之幕但裊疏香六榻冰紋之窗時拂纖垢於是華綈盥啟錦薦藉陳絲紅拭霞土黝捺漆鸞翎鏤采鳳汁漉涎凍不損棱白獺之髓膩不留手飛燕之膚凡鹿亭脩史之所需東河判牘之所具棣

華一泓菜園片雲如對先型用佐靈璧曰二十四舉其尤也
以名其齋佩所好也且夫僻於尙者委志倚於黷者墨
心故廟堂之鐘鏞不能喧守靜者之耳闌砌之卉蕊不能
怡遁潔者之目痼則成蠱障則受蒙翫不可需寶復奚益
迺質貞未賤三復少陵之詩德厚惟潤再牋君謨之記所
以奴隸珠玉藻續文章守山氣於欲泯葆天真之旁洩雖
磨少成老情之恃愛難常植因爲緣物之於身猶寄而一
室千禩寸球百金吾知翬字辨僞無讓乎宛陵按錄求材
罔資乎希鵠子侯之名用茲不朽已爲之銘曰

方珪員璧咀精茹華塵根斲翠玉蛭門葍麗芒耀斗靈色
鍊媧平範鑑萬祕文納竄新輝與燦古誼匪遐勝諸孫子

貺爾貞嘉

過庭錄序

姚燮

吾師歙縣徐廉峯先生官翰林時其哲嗣志導孟卿志恭少峯昆季隨侍讀書於京邸先生退食暇躬嚴督責以身示型二君退而筆之簡曰過庭錄柳玼之書韋賢之經不是過也燮謹爲校錄副編而序其略曰夫讀書九十七卷華徹罔慙爲賢裔改行二十九歲張充卒成爲通儒吳伯庸能以操厲守父風疏仲翁不以貽財損下志門庭藹吉喬梓交榮貽爾嘉謀大其世閥惟斯錄其明券焉先生爲健庵司寇公後五世以科第傳蘄州之詩名南昌之宦蹟彬彬或或冠組疊承而先生之緜祖德也以孝戊寅年二十九捷秋榜庚辰年三十一成進士改郎曹爲翰林由是

步諫垣典浙試歲戊戌

命襄校禮闈先生病辭

命未赴而卒賈逵膺文美之名陸贄著內相之譽而先生之凜

聖眷也以忠先生嘗謂曰孝莫大於守業忠莫大於勿欺勤學砥行守業之要也履分盡職勿欺之本也以故握緣飾儒術之綱不涉謾言上私書請託之疏不避權貴青箱衍葉王淮之爲僕射元孫豫政有防爰季平誠朱雲再世斡斡者稟於經罟罟者式於史則處之所以辨志而敬業出之所以毗

聖而讚康罔不導以躬踐垂爲令訓夫雜施不孫問方室

心師道壞已先生之鼓育門下也如丁子然在少府挾篋而至不必數千人其教習庶常也若戴次仲居博士偉義所陳可據五十席下座北面士無閒言高牀施帳共期入室則是錄可爲居師準衡者又其一結僞爲黨面而不心友道廢已惟先生略形迹而崇肺腑懲親比而尙渾融識子師爲王佐才郭林宗原非阿好知道林爲文章伯謝安石方與共游物以藍染而青蓬以麻扶而直則是錄可爲擇友矩繩者又其一且夫背賊以葆真治已之上律也淵量以納廣抑款人之閔軌也先生不拘閔於中心忠如心恕恆周慎乎矜从矛伐从戈司馬公之誠言嘗揭於佩紳呂新吾之語錄服之如蔬布內不以憤眊蓄縮逋蕩轉張

者賊躬外不以委隨妒嫫媠慢浮游者迂世則是錄可爲
處人已之權度者又其一若夫章句成一家之學箋疏發
六緯之菁給札以鐫華摩編以漚液惟先生流析原委條
列骭骹本李充之論文體陸景之典語方軌前秀垂範後
昆抑又其末也變以甲午鄉薦出先生門下入都嘗寓先
生之壺園品非結綠媿受韓昌黎之知煦若春風常依程
明道之座死生睽隔夢寐唏噓拜啟遺文曷禁涕泗聊師
卽世業之編寫充褚无量之校讐緒以枝分章以節次誦
卮言以膺明訓可當崔子之銘振鈞徽以翊

熙朝慎守范家之硯而先生之學行亦於是錄可見其凡
已

黃霽青太守綠牋詞序

姚燮

慨自雅管風淪大鏞蠹廢六同差黍三調逸匏浮騰累跪
之容不通於簫颿厲軒磴之趣不傳於弦麟援者其辭蛩
啣者其響於是有序步蘭畹濫觴金荃席冶以窮淫投爍
以匿穢泥犁咫尺詡爲瑤想巴延穢俗飲若蘭醪否或刻
棘肖人鏤冰似鄂椎鑿泡影馳立脆焦塗膏拚癢許西子
施翕之醜補繡成衲驚天吳翠粲之衣更有睥睨空虛唾
棄煩絮陰池不砥砢汎失流高秋有風駭獵無涖以衍溢
爲豪邁以鄙近爲清真元律其沈用吾喟焉霽青太守丈
兀岸河朔儀光斗山菡萏九葩內濯仙腑虹赭四字外瑑
朗神石渠承明之才綺歲抗李隼旗尙書之曲英塵擷韋

閒爲長短之言力洗箏琵琶之俗青蠶思縛出入九章碧雞
辨雄笙簧六代當其夕綺接芬春小繫夢笛尾涕下煙心
醉慵延睇水以蕩懷引眉絲以結語背花凭鏡纖髻窄波
兜燕坐衣素肩橫雪離合者影嬋媛其姿至曼難鐫極嫺
可撫爲之犀梳櫛玉腕管題紈羅帳燈昏三更畫樓之雨
橫塘月落一笏遙天之峯蓋綺而不靡情之止乎義也風
騷斯擅體續亦工楊造化爲波瀾植理寓爲根柢搓雲接
綫游絲裊哀擣麝和塵麴香浮去塗鵲削劍而眞宰愁權
引蟻穿珠而鬼工妒巧都尉之鴛鴦比翼魏收之蛟蜺五
銖張郎花影之弄柳壻微雲之抹罔不潔逾水淪燦擬觚
雕陽和蓄於寸心優曇噴薄萌甲剪於寸楮勺藥蟬嫣蓋

典而不滯韻之餘於文也而況宦游三十年足迹半天下
落日帆影羣巒翠橫明霜驟鈴千里沙遠凡夫上谷漁陽
之郡金陵武昌之都六詔三巴之鄉百越五陵之地耳目
牂牁夢寐灤潁清節所駐古懷與迎狎潮侶鷗摩棧聽虎
更或皆決漢唐掌收淮楚黃河遠上春楊不青烏鵲南飛
大江皆白露蒹葭天末亦有季鷹之思風絮城頭詎無方回
之感紆迴閒鬱伉爽聿抒則又壯而不浮氣能攝乎神也
要其汰語去滓斂聲入微西夏番陽陶爲一範側帽延露
嚮其同馨春水纏絲紅杏華貴茹商吐角無愆乎大晟量
孔斟絃不弛乎正旨用是式斐韡矻纏寃袞先聲裾後起
吾知猶響之於谷若影之在隨云爾余也弱已好弄壯復

多愁妍與薜知痠惟梅畫銅琶之淚空激銀屏之曲孰諧
浮塵已亡未預瀏飆之叶種芸雖在共嗟憊懍之稀何幸
天涯得邁同調於虜墨墨者跼於才躡躡者喪於律徒厲
翳之互競卒繒綾之不齊三萬六千場棄之慌罔八十有
四調聽諸傾陀則是卷也奚疑非伶倫琴徽太常宮矩廣
陵三疊鈞天九成足以躡李唐而追趙宋也邪真靈位業
五脂鍊陵陽之丹蓬弱仙風八琅協灋嬰之奏

周縵雲茗邊填詞圖序

姚燮

靜院生翠游絲午閒疏楞罨紅細桃春小煮水石鉞笙爲
玉聲拂研髹几煙有檀息思紆繆以絲窅時澹沲而靜蕤
幽蜨啞花續公謹梅影之篇單衣試酒和美成薔薇之什
聊託隱感誼比乎騷不爲曼辭制導乎惟此圖之所由作
也縵雲周君以鐵厓史才綜玉堂賦手珂玳天鏡璫價少
雙花髻烏紗杏簪第二范希文高樓百尺排惻爲懷宋子
京畫燭兩行神仙之亞方將昌掄

上國藻帶

禁屏用紬縱簾之正聲敢墮文字之綺劫然而錦蠶緒密
烏能避箔而謝纈幺鳳羽攢輒喜迴雲以引媚太空秋晶

河自銜霞江漪晚平風來引淥刪謔競以蜷意屑微言以
演神要厥指歸詎因情滯夫其枕梧當簟擗芭代箋鶯背
雨過乍堪墨賦蟬顛露褪微覺袖涼芙蓉與主賓媵之短
調冰雪相灌漱斟以巨螯疏鬢半垂評量蟹眼之沸橫波
一射噴薄磨煤之光足抵酒醺五石八斗可悟琴理九宮
七絃解西風渡江之歌何必桃葉知明月踏廊之曲亦是
柳枝山香攬塵靚蛾之粉衣轉碧天虹飲海方壺之幕色
皆丹於是淞尾簫船暱小紅之唱烏絲闌本鈔寒碧之書
斂古籟以松篁氣得秋澹薰靈沆以蒙洱味雋甘迴以視
珠櫟乞蘭犀匳捻桂肘囊叩叩同心結豆蔻之環手悅融
融嬾態昵檳榔之頰染妖織冶儂我懽卿者當有閒已僕

少工側豔長且悔之身尙飄蓬笛誰聽者記昔苕溪泛櫂
君共漁裝只今燕市閉門我惟禪榻那得偕攜陸子往品
中冷之泉歸當學步陳家去續日湖之唱云爾

阮梅叔雷塘話雨圖卷跋

姚 燮

墨卿伊太守以管涔名宿印綬江右五馬所駐召杜誦焉
焦里堂先生絜銘孝然潛志犧周郁乎虎觀之儒爲下士
矜式之二公者風流遠矣讀遺書記軼事心每契之梅叔
明經丈於二公爲莫逆交是圖之作蓋紀乙亥五月事也
去今者二十有六年而吾丈亦頽然將耄矣感乎星光萍
葉若夢之沈采高藻翔猶瘁之質託諸豪素寄爾遠思樽
酒其寒斯文具在時也蒸梅天海吹柳氣激入院屏騁迎
門倒屣初篁拭澗絃澀不鳴疏林坐煙几翠若渥玉鉤蕪
滿題詩帝子之陵鐵戟沙蘿讀碑將軍之墓胥浦之水忽
滃海門之雲乍升帆鳥向夕大江欲浮禾麥在陌萬綠爲

醒相與恣清譚悅佳序情匪逃隱語不涉私旣暢乎四美
之并復愜乎羣生之望一圖之作千古券焉然而華堂蜀
阜歐陽之謾久荒高閣雲山淮海之詩誰續蟲之所弔不
燕吟篝雁之所墮已青墳草凡埒於卷者如劒潭宛轉之
吟山尊摧抑之句琴鳴淒戾之什并叔伉俠之篇罔不人
隔琴亡羽殘爪賸而吾丈於此能不淒然而悲惻然而淚
邪於虜因巢覓燕香沈風絮之波撫蛻追蟬韻在秋桐之
籟豈元化之多迂竟勝事之難再自我讀之因思吾生之
所與車投笠合者何亦蘭摧玉折研焚劒棄之多也芳蘅
在流迹不可掇斜日冉冉柳絲拂舳泚筆題此未免增友
朋之感爲唏噓者久之時庚子春泊舟於維揚之郭

書徐隨軒韻紅樓曲圖卷後

姚燮

歌嘯曷寄睠彼佳人蹇產所極釋之香草菴心欲冷轉憐
紅麝之熏桐尾雖焦可撥青萸之引拂景易逝撫韻多乖
近愉所遘古怨繫焉夫以烽煙海國無地安筇金粉山川
忽來側帽借情藥憤習綺培枯明星在天疏花當井玉簪
炙而微酣破珠箔卷而嫩涼生滴心淥以泛萍貼眉山而
竊翠羊侃之繡褌宜攬瀉于之薌澤可聞眼底風懷夢中
水逝本非蕩子詎真欲老是鄉言念故山殆有不堪回首
者惟時練塘師老申浦櫂流臨潼不關昆侖竟陷嗟湘書
之盡燹慨鄰屋其早墟白髮窮途共領頓顙之味黃泉新
涕難招弱餒之魂時隨軒喪子則寒蟬復向誰號而羈鳥其將

白鍛乎迺翻白司馬之調託庾開府之哀倚袖擘牋儂其
小李停橈問姓汝亦長干桂樹云彫應撫枝而咒籟唾壺
可缺當散髮以逃禪虎敢牽絲犀誰剖理罔遏騷想聊寫
曼聲孝穆前身仲宣今感聽到念家山破白雀何飛待渠
陌上花開黃鶯柰老讀是卷者宜知其隱已

翠竹軒後記

姚 燹

明宣德間西滬王公國衡性喜竹以翠竹名其軒其嗣君
彥承公屬進士吳貴爲之記流風之邈幾及四百年清芬
所誦誰爲賢孫子嗟蔡中郎云逝但餘柯山之亭惜王右
丞不歸莫問輞川之里紉薌茂才公之裔孫也其宅亦多
竹而名仍厥舊微特欣衡廬之有託亦以撫栢園而不忘
觀其苞解釋黃葉灑涼碧濯以明瀝櫛以靜颺山簷上橫
嵐色相避澗琴下泛玉聲與沈偶巢幺鳳纖月來媚蒼帚
一拂流雲亦媽可以當與可之畫屏續子猷之佳話命酒
其下交接古懽讀書在旁吐納清氣迴影盪而素壁皆淥
暗籟洩而暑夏亦秋抑復埽薜代薪試玉川之蟹眼菹筍

入饌佐東坡之花豬宜主人情不就囂習不染俗悠然會
此中之意而翛然得塵外之風也且夫茱竹猗猗詩人以
之美衛武公竹箭之有筠禮以之比君子亦謂德偶松栝
品侶芷蘅蟠根內堅樹節外勁陵遷谷改其天不彫紅綺
紫靡此品獨潔虛惟能受葆元在中霄亦可干騰勢必上
主人兼有取於斯與矧乎護暉正長並偕庭幃之蔭棣鄂
方韡不分左右之鄰晨擷其馨夕飲其息斂迹逃穆避世
謝紛拭海苔之箋詩或媵之佳士理君山之瑟曲何怨乎
美人有那其居云胡不樂揮爾塵以對恍挹晉江左之風
媿余情不芳徒繫楚湘潭之恨

潘紱庭光祿山抹微雲館詞序

姚燹

夫雕鏤刻苦宵辭以晦意縱宕跌肆使氣以益神惑世錮
深律古繩失迺使大晟之譜供彼蠹饒下里之音紛若螳
鬪潘君紱庭盛年逾弱世胄席華撫慘綠以自憐屏輓紅
而弗染沈辰涵夕依性於文章眷雨戀風篤情於昆友兼
之才抱天雋學極海淵藻思摘新花樣匿祕中蘊者厚故
怨不過則素濯者絜故麗不近葩想其拓箋渲豪仙露垂
掌量笛尋羽風籟瀉春扼其清妍江上綠蕪之水窺其超
澹天末晚晴之山金錯之刀與蘭同佩瓊樹之髮不澤亦
光眾妙而能一兼鬱受所由邇達曩刻秋碧詞暨唾香花
室詞通二卷鹽薇雜誦吹柅溢芬遶近亦罕傳後可筮茲

卷鉤提騷雅圭臬石雲選格益醖滌光逾潔爲之微諷儻
來遠神纖蜨上階花融融以吹霧疏蟬在樹葉槭槭其欲
秋畫角譙門之聲鐙火高城之思柳耆卿是真情種桓子
野輒喚柰何矣彼案衍夷曼粉飾鉛華僅濫列於小巫誰
勉進夫大雅援筆弁首令我唏噓矣

邢湖觀秋荷記

姚燮

甲辰秋初舟過魚臺邢莊官湖千頃荷方盛開沿洄其間
望與思遠高日平照葉背皆白遠樹交合花氣轉碧水角
一蕊悄疑伫人澗末斷菰涼可招雨鮮葍有露墮蟬自斟
落瓣如艇孤翠來立玉笛能按惜無女郎明月可憐但照
淒夜昔者江南采綠西湖鬧紅鶯嬈鐙船鳳子簫局衫上
雲膩扇底風香橫波渡笛落日送燕美人采采青山依依
一白石帚遠游桃葉大去畫城煙水難覺墜歡茲以聞晤
偶緣宿情遙寄殘英猶縟風不忍吹斜澹稍空蘋與之補
芳靜逾媚影亂益多欲寫新詞聊對佳醞迴櫂景逝倚舷
眼穿天島川平渺渺而已

金陵陶桓公祠記

汪士鐸

穀城片石專祠曾紀夫留侯峴首豐碑遺愛尙思夫羊傳
威揚虎塞朔方傳蘇武之勛廟壯龍編銅柱想伏波之績
然雖功高往代祀迄來茲續銘景鐘食配冢土要未若晉
太尉陶桓公之盛也公之忠純明肅允文允武弼亮厯世
戡定羣醜功名之赫福履之綏載在晉史無煩覲縷獨其
手翦鯨鯢親夷梟獍一匡社稷再建淪鼎有大造於典午
宜尸祝於金陵者其事可得而詳也原夫翟泉鵠出鄴苑
駝荒金精含鉞刑神秉鉞王茂宏以夷吾重望而攜子出
奔卞忠貞以都督禁軍而結綏報國九州牙纛莫伸貔虎
之威六郡良家盡化蟲沙之隊飄零衛士嵇紹之衣無聞

跋扈將軍侯景之舞先見斯時也三綱淪胥兆人塗炭申
息之門不啟泗淵之鼎幾沈火建章而兵譁照甘泉而鋒
偪殿有蒼鴈之擊圖遷石馬之謠惟公統九節度之師受
上將軍之鉞運籌則天地變色叱咤而風雷頓生南郡樓
船西陵强弩三郊三遂罡風生鳥隼之旗九地九天太白
耀龍蛇之陣遂乃壘營白石鋒指朱航斬王莽於漸臺殪
蚩尤於中冀元女授律爭椿富父之戈枉矢燿芒遂懸樓
蘭之首嚴城靜柝寶厯重膺方諸桓文彼有慙色石頭城
者卽公斬蘇峻及其弟逸之所也蛟蟻蟻辭與投鞍而爭
高淮水淵深曾洗兵而載戟行道慨慕士民景行夫樂布
匹夫之義猶配社公桐鄉下邑之官尙留廟貌邯鄲公子

爭欲繡絲豫章先賢式存畫像朱穆圖形於冀北韋義立
廟於廣都矧公宗功崇德焜燿青史而箕尾一騎實沈不
祀華諸祀典不惟闕如屬在頑廉何以興起道光丁酉公
裔雲汀宮保迺於石頭之陽博山之麓爰究爰度是斷是
遷特構專祠并刊樂石立象祀焉禮也緬維君爽分陝則
勿翦見詠錢鏐在浙則表忠留祠以及諸葛之營沔陽乖
崖之泣西蜀麾幢所至氓庶興感則今之拜瞻簪笏慨念
徽猷者庶乎勵其百行慕臺孝威之爲人觀乎九京懷隨
武子之遺德矣敬揚大烈延伫將來其辭曰

於赫長沙蟬聯陶唐舍佐赤帝啟彼漢疆散閔比烈圭冕
以光慶衍司馬式是南邦

其一

桓桓司馬篤生尋陽敷歷交

廣鎮撫荆襄陳恢號亂張昌鴟張聚而殲焉雪沃以湯

其二

山頭廷尉歷陽陸梁穆皇元舅如魚潛藏天子冢宰如豕

奔狂七萃統帥致命疆場

其三

矯矯祈父鰲鶴淪喪枚枚寢

廟鐘虞云亡祈祈紳笏輦帶靡常嗟我士女罔扶天綱

其四

司馬西來我武孔揚率西諸侯投袂勤王進退規矩龍虎

在旁擊刺止齊熊羆是強

其五

如弩穿縞如刀截肪困獸入

弇脫葉經霜鑿齒手殪猓貊走僵九廟肅清天步以康

其六

羣牧圭執八州保障勛懋墜旒封視兆璜歸藩遜位山高

水長我登廣武抗懷激昂

其七

江漢望楚闕伯食商士稚治

豫譙梁建堂子產相鄭滎陽留芳元功在民祀事孔彰

其八

嶽嶽尙書起自湖湘裴回戰壘卜食高岡修堂秩秩重門

將將式是百辟股肱元良其有籩有豆以蒸以嘗祀等瞽
宗地擬上庠冠帶有楚威儀以莊啟我後人視此勛勩其

肇域志跋

汪士鐸

輿地之學遠有轍迹原其義類端貴謹嚴推及經世不妨
廣博蓋蘭臺削藁已有自注大書細字實分兩塗準是而
言宜爲分別甄綜大段厥有數端辨方正位首重至到禹
貢職方乃其前軌杜李繼述疆域益明今擬列至到第一
其原書所無者蓋厥如也考古證今必資沿革鄭氏白羽
盲左爲之椎輪故秦莽曰班氏嗣其芳躅衝要簡繁比於
畿緊望赤埒而綴之取諸簡也至若周平西之記風土劉
澄之之記古今語近浮夸宜爲小注今擬沿革第二四列
三條道山所述五嶽四鎮望祭所宗今擬山原第三雖不
能如伯益之條其里數而郡邑東西亦宜小爲比纂冀豫

沙土水道之變多端東南塗泥溝渠之徙絕寡今擬大川
小水以類鱗次第四而塘灤隄防功資灌溉鴻溝三海險
限戎馬概埒於下語焉必詳亦爲注焉東省泉源賴以轉
運湯湯汶水實爲樞紐今擬有關會通河者著於諸水之
次爲第五舊縣故城足資考證離宮原廟允見前規故姑
城延津昉於武庫伽藍宮殿目紀隋書今擬古蹟第六五
冶所以富民六苑所以考牧南津稅賈三齊服官旣立監
司宜從記載今擬戶兵工諸分司第七而藩封比於侯國
官府延於都尉昔人之成例也後賢之則倣也田賦辨於
九州琅玕詳於九府兩稅土貢度支所重今擬賦稅土產
第八碣石入河雲颿轉海記里之鼓行者所珍今擬水陸

郵程荆揚海運前後相次爲第九樂石吉金明誠之別錄
鬼神人物樂史之蕪詞凡若此者旣不載芟概附於末爲
第十惟是編乃昔賢未竟之書薈萃志傳未及裁翦容有
錯簡失次亦或鈔胥匆劇天吳紫鳳不止烏焉豕亥之訛
排纂諸君宜爲刊謬然先生淹通淵雅卓絕古今所引諸
書十不存一不知而作貽笑金根湘鄉相國闡前哲之幽
緒貽來學以寶筏屬以寫官印以活字大懼繙緝之艱不
居讎定之迹以士鐸嘗從事於斯命卽原書略發凡例修
之明之以俟來哲云耳

與戴子高書

汪士鐸

子高先生二十九兄侍史聞小不快近少差不世無吳客
莫之與發頗怪今人善作蠱毒多不至八小不至六請悉
數之取譬竟陸中西諸法滓溟莫測擿埴索塗跣足履棘
鑠精瘁神其病結轡南豐吳氏指迷方也索易戎夏目眩
吳楚荒倉僑置莫知其所有是病者數多譖語宛溪顧氏
醒心湯也倉籀以降紛紜副墨鄉壁虛造六義以忒取笑
召陵是名狐惑高郵王氏洗眼擅場也遷固之後陳歐爲
長誰與嗣音東都之王餘子龐雜使人健忘嘉定錢氏最
爲青囊散文十家唱歎抑揚義法嚴峻一切秕穢嗤點八
代病在發狂桐城姚氏今之長桑駢文神韻齊梁爲優五

色以宣八音以幽不善爲之病在煩嘔西溪曾氏折肱之
良靈珠崑玉比之閒關極命草木妝點雲山浮薄者爲之
其病癩癩新城王氏絕代岐黃如是我聞是諸病者其內
沈默外高明也切脈旣難處劑益寡或曰汗之恐其忘陽
濡豪染翰滂沛潢洋津逮百氏恣肆發皇否則吐之淵雅
其聲鳳鳴蓮馥石破砥礪波湧雲委惟天亦驚將欲下之
又恐自利海外流傳國子習肄不脛而走縑素墨翠凡此
諸病結習爲障攻之不達補之增妄通之斯明宣之斯旺
世人之病愚不能知君如病此二方足醫人遐室邇姑爲
謔兮

方仲堅墓誌銘

汪士鐸

君氏方諱凝字仲堅徽州歙人也年十七補博士弟子摘藻華春大音鏗夏父某善青烏術挈君游江甯遂爲江甯人梁鴻高懷出游吳下宏微名士爰宅蘭風君淡於榮利恬於進取侍郎程春海師君同學也吏部程也園君知己也是皆提攜文衡吹噓寒素劒逢辟燭可號干將馬遇孫陽定登上駟而乃飄零書劒落拓江湖彈冠可慶而裴回於桑野之間解帶匪難而絕意於汝墳之什君之高風其一端也君善於筆札精於書翰阮元瑜之書記實冠當塗褚登善之法楷原本典午任城孫寄圃節相邀掌書啟珥筆睢陽之臺曳履稷下之館葛龔作奏殊絕文士之工正

平爲書曲道主人之意然君有伯夷之清無申棠之欲諸
侯羔雁雖充於庭前上相貂蟬常輝於座右而胡威清節
每畏人知吳隱廉名不因泉染旣而贊皇去位天雄罷鎮
君追隨袁浦不異任安痛哭廣武幾同阮籍山陰平槭峯
太守與君最契君與之北至鍾吾南尋禹穴東渡滬瀆西
過夜郎周回萬餘里出入十餘年千金誰贈竟無好時之
田片石同歸再見鬱林之舫驚陳遵於四座不少憐才酬
皇甫以千縑有誰好士衰病交集襤被東旋厯佐王春綬
太夫子及毓星浦崇兩船陳蓮史四方伯幕府府主數更
日月無幾張奐名馬不入於廐中博士痿羊僅充於廚下
工部欲拔之屋猶賃居人齊卿旣浣之衣尙留質庫筋力

告乏出無下澤之車齒髮已衰食祇脫粟之飯炊爨下役
惟有樵青酒漿中饋未聞絡秀君之介節於此見矣讎合
龍蛇曰悲鵬鳥三命有限二豎交棘時道光二十四年十
有二月也春秋六十孺人江甯張氏糟糠久歷荆布恆歡
子光垕出嗣伯氏女一適上元廩生徐蔭穀孫銘新尙幼
光垕將以明年祔君於君考之塋禮也君律己最嚴擇友
最慎編紃之贈不乏使君杵臼之交惟餘下走橋元過車
之約心識前盟伯旂猶視之悲情慙復撫寢門一痛憶山
陽思舊之銘貞石百年擬中郎無媿之作爰踐宿諾以紀
餘哀其辭曰

猗與蓮幕見此天民南琛孚尹東箭有筠雞廉勵節馬磨

傭身八口仰屋五月負薪正草合度賤奏無倫鮮采翡翠
彪炳鳳麟與君結友廿載昏晨鄭君教授山公留賓厲壯
武志知敬仲貧城府全墮肝膽式親抱獨守默茹樸含眞
伯子意遠公瑾飲醕曹倉不吝杜庫渠珍雙龍護久一鷗
借頻菊花涼夕楊柳穠春煙昏寺塔雪沒城闔雞豚饌熟
鸚鵡杯陳沮溺有約元白結鄰華年周甲妖夢在辰桃源
無洞蒿里埋塵巨卿魂逝劉沼書新裁總爲帳執紼下窰
疇昔執友今成古人生金何日視此貞珉

春水詞序

集夢窗詞

顧文彬

路入蒼煙天低遠樹峭雲一片明月初圓藻國淒迷暗聞
香澤麴塵激映膩漲紅波正萬里胥濤雪銷殘溜與一川
平綠風裊垂楊連樯橫塘浣花新宅香籠麝水並禽飛上
金沙浪打鷗磯細草靜搖春碧苔根澆石蓮尾分津一葉
舟輕兩隄翠市花穿畫舫絳雪生涼柳暝河橋碧霞籠夜
桃源人世粉黛湖山雨笠扁舟錦帆一箭悵斷魂西子又
笑伴鷗夷鬥草心期輒紅南陌看花時節澹碧西湖記掩
扇傳歌共評花索句錦瑟華年深院臨水開窗落梅煙雨
黃昏揮豪記燭旋移輕鷁淺傍垂虹驂鳳迷歸彩鸞愁舞
頻經翠袖清尊素手重攜曾寫榴裙一鏡萬花爭妒簾外

燕喧鶯寂夜深簷煖笙清擁蓮媛三千誰管采菱波狹倚
瑤臺十二猶聞凭袖香留有情花影闌干紅篩碧沼得意
東風去櫂清絕緇塵畫舸頻移豔晨易午離亭黯黯恨水
迢迢傷心千里江南彈指一襟怨恨問閭門自古舞葱歌
舊能幾花前歎故友難逢翠冷紅衰送人江上寒梅清泚
缺月孤棲涓涓暗谷流紅仙雲墮影點點漏壺清怨淚雨
橫波誰伴嬋娟頓辜歡笑當時燕子飛過誰家別後蛾鬢
痠還如許除非照影自憐兩鬢清霜似說相思付與少年
華月五湖春鴈送客吳皋一縷新蟾隨人天角短亭初泊
機心已墮沙鷗故苑年光曉夢先迷楚蝶伴蘭翹清痠遺
韞塵消念客枕幽單嚼花鐙冷更攀情話應費新題恨賦

筆分攜歎畫圖難仿何郎詩卷怨曲重招太白仙人錦袍
初擁笠蓑有約風雨愁人絃管當頭江湖同賦幾度吟昏
醉曉日費詩筒無人野水荒灣天澹藻鏡在鐙前欹枕離
痕歡唾都是思量向夢裏消春斷柳淒花可憐蕉賴恨盈
蠹紙乍溼鮫綃翠羽飛來贈將幽素紅牙拍碎亂寫明珠
人生未易相逢翦鐙留語海上偷傳新曲臥笛長吟彩扇
翻歌偏憐嬌鳳烏絲潤墨總是愁魚蕩波底蛟腥化爲飛
霧滅尊前歌力吹裂哀雲酹酒蒼茫和醉重尋幽夢賦情
縹緲無言對立斜暉渺煙磧飛帆吳船回首訪武昌故壘
菊井招魂臨分敗壁題詩都無歡事還泊郵亭喚酒暗憶
芳盟爭如連醉溫柔重省舊時羈旅游雲出岫倦蜨慵飛

背日移花香鱸堪釣謾客請傳芳卷晴暉稱拂吟牋敢喚
起桃花與安排金屋冰絲三疊莫唱陽關柳帶同心共歸
吳苑一匳越鏡祇應花底春多萬感瓊漿莫道藍橋路遠

答汪蓮府昆季書

俞樾

青衣鼓瑟之辰黃海觀雲之地諸君子擁商陸之火張博塞之筵柏葉酒香梅花帳煖樂何如哉僕自別後金梯有路玉札無名秋駕三年春婆一夢麤麤病翮不隨黃鵠以飛懵懂頑仙仍跨赤牛而走猶憶綠楊隄畔青豆房中雨訪蘇端月尋裴迪清談旣洽情話益歡飯顚山頭深憐杜甫桃華潭上許伴汪倫徑因求仲而開醴爲穆生而設果使秋風此夕聽鮑龍跪石以吟春水明年看墨翟吹笙而至豈非緣從人定願竟天從也哉無如毀舟爲枋者故人之情買釵得梧者鄙人之命盼素書而不到信斷飛奴坐墨席而難溫身同蘭子遂乃擊汰過嚴陵之瀨呼舟乘胥

母之潮雪影入船每當月看灘聲到枕常作風聽拽怒眠
遲束囊起早雖疲遠涉頗愜幽尋而落日荒荒方補脣之
故宅寒風策策謝晞髮之高臺又何能無老大之悲天涯
之感也今者勞人草草彈鋏隨人君子陽陽執簣招我方
知諸君子因孟玉而懸榻爲子義而立竿置薪井上以待
夷吾接草道旁將迎伯玉僕豈忘宜生之切肺而爲伯牙
之逃聲哉饑雀逢倉渴鳥遇水良亦不能自主耳浮雲南
北流水東西團雪散雪之歌今雨舊雨之感所望香火之
緣未昧煙波之夢仍通他日曹阮谿中一篷撐月浮邱峯
頂雙屐踏煙再與諸君子訪翡翠之巖探芙蓉之嶺甚未
晚也仙難縮地佛不唐捐此日相思聊劈茭皮而寫異時

話舊再揮松柄而談

張棲竹先生棲竹圖序

俞樾

予乙未歲始晤先生於毘陵卽承以棲竹圖索題予披視之清氣偃乎鬚眉爽籟流乎煙墨其人宛在合封瀟灑之侯小住此中不減簞簞之谷予時年甫十五出頭未得醫俗無從正共羣兒爲騎竹之嬉謬承長者有折枝之命今圖中長歌一章蓋爾時作也碧鮮偶賦青削難工童子何知聊作聚沙之戲先生不棄遂同撫塵而游迨庚戌歲予請假南旋復晤先生於毘陵歲月如流一星終矣煙霞不老萬箇蒼然重陪佳士於坐中如對真人於天際猥以全帙索我片言敬獻枝詞聊供竹笑今夫鳳皇翔於千仞喻所託之高也鷦鷯巢於一枝明所居之約也先生以鳳比

德擇木而棲非鳴盛於高岡卽蜚聲於元圃而何以年年
空谷倚袖常寒寂寂柯亭賞音罕遇雖洽幽棲之趣或增
搖落之悲乎然而餐煙飲露四時之氣味皆清抹月批風
一室之圖書盡綠遠攀鄉樹桑梓猶新俯茁孫枝檀欒可
愛以視渭川千畝矜通侯之榮鄧林一枝逐夸父之步者
其風致固何如也予辭京雒之塵初還倦翮飲蘭陵之酒
重挹清芬十年聯青士之交三日住墨君之館拓新陰以
棲鳳願從君爲丹穴之游覩舊日之塗鴉愈令我憶青鑑
之味

辭慰農觀察江舟欸乃詞序

李肇增

夫溷景朝市一視蘿袞鑒彼勞生達視齊物非不可擺脫
蕭机作宏農之坐嘯陶詠溪谷追客兒之游娛然而珪組
牽絡襟靈弗暢政繁東閣或阻興于命篇氣爽西山徒勞
形于執板一行作吏九能轉局佈然感矣是故藻瑩幽素
發皇文翰希風竹溪之侶乃足苙觴歸隱鑑湖之濱方滋
山水魚鳥樂致曦月送懷其內史誓墓之年興公遂初之
候乎椒陵辭慰農觀察鸞鶴標質穀玉兼才三筆之雋挺
秀家衡二始之美騰聲郡秩方開明聖之利惠溢葑田遽
卻翠黛之留情殷香社河內莫借東峯頓歸論者惜焉然
而水波不競湛此寒泉崇蘭信芳眷于空谷冥通遐寄有

性存焉亦微尙之不可及也于是抽簪自喜命權灑然賦
三閩之涉江應八公之招隱紱冕旣謝笠屐相尋聽水焚
蘆之庵狎月桃花之隴斜陽煙柳孤懷獨攄濁酒殘鐙墜
歡若接並入妍唱發爲清聲若夫江濱隻雁招魂不歸天
末哀蟬懷香無夢舟陳大被覆夜雪而逾寒山對小姑憶
朝雲而彌楚鵠孤寫哀鳳靡鳴恨斂靈均之些極竹屋之
癡言愁欲愁吁可戚矣乃若柴桑歸去松菊並荒輞川故
居溪山異色鄰曲則流人雪散耆舊則故鬼煙嘯遂乃董
逃續歌亂傷白馬阮哭抒痛聲激黃塵綜此鬱伊具歸促
拍夫公謹蕢洲之譜君衡漁唱之詞類皆戔響蘆碕結念
葭水此則江湖遺迹動若虛舟山川拓懷從其弭楫聲答

鳴雁興逸垂虹圭塘之後欵乃名集信無愧古人矣在昔
始興罷守貧乏襦衫東萊還家儲無甕缶維君歸狀清素
似之吾知晉平守約未足山資陝州才良終爲國寶北山
之阿暫棲一鶴西湖之曲還遲單船民望方殷斯人卽出
是又琴酒輔趣難淹池上之吟鼓節宣風更奏襄陽之樂
以彼治譜暢厥雅音小山非工大晟且作乘風便去君更
陟夫瓊樓飲水能歌余竊尋夫金井

茗雪游記序

蔡召棠

吳興方屏金蓋之岩堯前溪碧浪之洑澗靈竟所萃高蹤
若邀自來名流俊侶騷人逸士梯苔命屐載酒鼓枻而至
者蓋不知凡幾然使句留臯臯延緣林泉而莫之爲紀若
水噴漚過眼卽滅游如未游也紀矣或未能刻琬山態續
樵水聲如木飾偶全神俱失紀如不紀也曩予橐筆齊魯
荏苒三載屬車所莅流覽殆徧坐春水宅浮滄海湄昇逍
遙子躡泰岱頂少皞墟荒斟尋亭古披榛秦碑剜薛漢碣
行李一肩潦草半冊亦復浪使麝墨麤記鴻爪顧自念管
豹得斑磬龜無腹梔貌僅存蓬心未洗意蕪辭藁稿脫隨
毀及今凝溯杳矣前因曼壽茗雪之游時不越十日路不

過百里繫鞵出門聯襪奉勝驚儔侶鱗萃麇至獨能模
範意象陶寫襟靈膺泰合舸牙期遞絃我歌汝和情往興
來迺使坡陀屢屢洞壑窅窳常若顯顯在目是惟達於詩
故憑眺所泊盡貢吟料優於畫故煙黛所交爭入畫圖其
所著述欽崙礪硤淡演冲融波光嵐翠鬱鬱從腕下起不
待畢誦輒引入勝雖不能至恍若晤之曼壽誠起予哉

五湖煙艇題贈集序

楊 峴

煙艇集者又雲公子爲方秀姬作也綺恨如雨思心若波
其詞豔其怨深焉予詢諸一粟廬主人盡得其詳秀姬漢
皋仙姝洛浦神女擗箏樓上煙雨凝笑打槳湖畔鴛央背
飛水面荷芰如妒芳澤岸頭楊柳都避翠睂時公子方爲
消夏之會一騎出城萬花迎路縞衣滿前絳紗不存則有
清臚窺牖驟覩星采輒語隔簾已聞麝氣曉黛顰入夕鬢
娟來公子鮮然異之詢知爲姬遂與定情人月一船載夢
俱穩風露初夜雙栖不驚青鳥翡翠無以喻其婉變矣無
何飛言中人好事易敗仙蜨一去乾螢不然扁舟何處人
在愁海錦琴不張身作枯桐墜歡地上不忍再拾悄然掩

涕遂付吟弄然而種蕉百本未必無心織緜五丈應須成
匹蓮子的的知有苦味蒲帆幅幅終待歡成公子其姑耐
之索居孤館一鐙如豆研墨吮筆爲敘緣起紅葉不爽此
其左券

何子貞學使游峩眉瓦屋詩草序

顧復初

秋霖彌天危屋涖溜逾三日夜岷江積波鱗駢迹杳直注
旁射隄庸決潰瀕傷農工東洲先生其魚之感同符於明
德懸釜而炊慨歎於晉陽鬱慮於懷默回荃絳塞天之漏
一日高懸踏地而歌眾峯齊出民有歡心顧盼以樂迺命
游舸搗颿芙蓉之里委櫂玻瓈之江掠凌雲而西溯青衣
之上侵尋躋於峩眉之巔焉夫其抱昆侖之祖榦屬普賢
之初地神靈聿鍾凡愚均慕金沙佛國膜拜交肩玉葉禪
林雲游接踵然而廬山表奇於遠公天台發秀於孫綽不
有鴻才孰名巨麗乎瓦屋山者與峩眉相隱顯者也古苔
盈尺危徑際天介在荒裔人迹罕至鉤鬚拳爪樹形獸蹲

蝟鼻感額石貌老醜譬之畸人跡弛局外藐焉寡傳傲岸
獨立先生拾句孤霞之表舒嘯眾壑之上遂乃發奇於覆
洗醜獲妍爲游峩眉瓦屋詩兩卷歸以示初蒙惟先生古
抱在胸與岳同峻天秉自質視湘而清自侍承明屢秉衡
尺履綦錯於寰中幽討極於微眇矧夫涵咏書林研究細
素後視秦項平規羲軒山海鑄其性靈風雲緯其懷思日
月朗其燭照鬼神司其腕肘出游名山若獲奇士時爲傑
語便符天真故其咳唾煙露雕鑱坤乾構虛造形神召精
洽邈乎遐哉靡可得而挹云秋月澂霽涼颿肅然小極乍
起莊懷咀頌如讀七發陽氣漫淫滿於大宅願繼大夫斯
游之樂

宋浣花遺詞序

劉履芬

長洲宋子浣花性含幽清志尙簞子家庭之閒尤備行誼
琴劍之外耑嗜倚聲蓋嘗論之忼然清皓夷白自持浣花
之行也淵然縝栗劇鉅不窮浣花之學也至其爲詞得自
性生豪而不疏清而不薄雛燕拂花有春妝喻麗哀蟬泣
柳託秋語傳悽吾鄙之言詞者未能或之先也居恆悒悒
謂材僅中下力弊衣食與時大逆所學不純又以垂白在
堂終鮮昆季嘉偶早殞生無允子天不佑善憂能傷生時
粵匪俶擾金陵京口同時淪沒吳郡居民一夕數驚君屢
擬避地屬少親知拔宅之術坐誤于公房辟兵之符訛傳
于句漏庚申吳門就陷盡室殲焉嗚呼歸全家于浩劫生

等鴻毛縱九死而奚辭冤沈精衛此之禍酷可忍言哉余
 僑寄吳中過蒙知愛年旣相若居近比鄰每及有作互相
 欣賞一字之師銘心勿忘兩家之僮汗走于道迨余游京
 國離索曠居千里征塵閉帷獨坐十函問訊附竹不疏時
 吳中同人率刊詞本君書貽余期以十年此其矜慎匪僅
 自娛乃蟬編就腐莫探手迹之留鶴弔無期特甚嘔心之
 慟聽彈琴于海上子敬云亡櫝枯腊于溝衢匈奴未滅冥
 冥卽夜炯炯如生疇昔之夜君形于夢握手言笑宛如平
 日發篋欻獻尙存牘簡哀錄一通兼墨其首異日者出茂
 陵之草或覲全書狀卞壺之生自有鴻筆以俟來哲當無
 閒然

送徐洽之返里序

劉履芬

余之識洽之也舊矣猶憶甲辰正月洽之以事過余銜袖一卷迺出茶餘沽酒百壺差嫌脯敗青衣列侍東閣貴自
郎君玉琴載彈上座敬延公子十年中此境蓋屢易也黃
鵠上天笑雲泥之易判青鴛依佛懼智慧之將凋空山孤
往豔不掇霞古屋漸積夢惟對月蕤蕤瓊蕊騷騷白楊巨
卿之友或多淪于九泉伯牙之琴將永絕于流水其誰知
余哀也洽之則以其閒揖鐵甕之城問孫劉之故迹浮東
溟之舸望海天而長嘯荷衣稚子玉雪可念板輿大母風
月能談數照水之梅萼綺窗背開擘定波之蓴絲香廚午
啟洵獨得從宦樂事矣夫余與洽之同郡人也燕以西飛

而止能辨鄉音竹有外苗之名難懷故土越吟無改乎莊
烏吳儋已嘲于會稽而尊大人綬綰半同絹乏一篋有懸
蒲之愛以菰菊爲芳茲得免墨纒之從軍盼瑤鏡而弢彩
雖美志不遂于放懷良得也洽之行矣路有萬里壽期百
年開軒而對綠疇問天而搔元髮天佑循吏山待隱君將
與洽之抱甕同汲負杖相隨古柳邨莊說父老之故事斜
陽里塾解童蒙之孝經偃王古廟酒脯備羅盈川一集朱
墨雜寫則亦何必湖船聽雨守孤進之還丹板橋犯霜哀
曲終之裂帛乃見飄然自怡魁焉特峙也龍邱先生其或
招我

寄孫琴西太守書

劉履芬

琴西先生閣下往在都門辱承手畢繼聞引疾林泉頤情
邱索山川綿邈嗣音久虛頃聞敬悉揆帥倚重

疏請來皖部民竹馬重迓使君太守油幢將蘇彫剋聞風
引領想望政聲幸託鄰圻何如忭舞履芬羈棲京國從事
金曹吳門之陷歲值庚申家室流離弟妹殂喪索長安之
米難慰白頭慟劫火之傳竟摧斷翼憂恐老親兵戈展轉
屬有親知偕移滬濱周歲以後音訊甫通舉債遄行請急
省侍海艘百萬但容一粟之軀水驛三千孤倚片帆之影
經歷駭怪出入混茫申江旣達人煙始親識高堂之容貌
絲鬢如銀喜遠道之歸來緇塵未浣無如餅盞夙罄說欲

生愁骨肉就零撫而益痛而且地居四塞僅一水之通賊
圍重偏無半椽可託居類露宿坐唯雷歎復從海道暫止
崇川一葉全家竟挾陽侯而走三旬九食反爲羣盜所憐
居人驚訝問訊頻來時則袁江賊擾北轅道梗仲宣漕帥
篤念先契命參戎幕縛黃皮袴褶自號從軍著絳色兜鍪
頗能觀戰帶甲雲屯草檄風起逾歲論功改官外吏居適
鄰乎雁戶位差擬于馬曹家具安排頗費心力文字之緣
久已拋散以此負慙于閣下耳遙想驥子能文定追大雅
龍門舊著久鐫行勝不審尙有餘暇弄筆否吳越千里兵
燹迭遭甌江一郡支拄無恙鄉閭捍衛定有奇策尙因便
羽示悉一二都門舊侶都已星散僅就鄙州而言鏡湖子

春松坪均各奉諱鏡湖賣藥燕市子春聽潮惠州松坪眷
屬羈滯鄂渚升沈之感倍切于雲泥離索之悲無殊乎原
隰閣下昆季迴翔中外珥彤鳴鐔各極才能華覆鄂承相
順榮顯唯望建牙東下俾獲負弩先驅躬承顏色實爲快
幸耳書不盡意臨穎主臣

西山荷鋪圖記

劉履芬

微雨初霽叢樹留馨訪金子漱芷瀆上寓廬地饒水竹室
羅琴書焚香儷清淪茗忘倦語次出西山荷鋪圖見示蓋
其自營休神所也地則穹窿支麓天平左區挹太湖之清
波瞰莫釐之遠翠春風蠟屐山鳥皆馴夜雨彈碁松濤彌
厲藿粥而安天下試尋高義之園肥遯若可終身重葺凡
夫之宅信夫九原可作起隨會之思一邱欲臥同襄陽之
逸嶽崎可喜哀樂俱忘嗟夫臺卿不逢憂患徒存僑札之
思司空自樂隱淪追想峭華之勝畫圖如昨詩句可歌先
生辭家作客已倦于輪蹄問舍求田肯昧夫羅弋啟篋而
視雅有傳書披圖而游先盟息壤南山之南北山之北載

酒幽探斯人宛在某固伯倫之裔子也薄宦未成華年易
邁擬閉關而作頌有愧吻枯欲策杖而來游徒勞足企或
者偕山公以沾醉尙擬行歌幸陽五之同時不須尙友持
詢先生倘容莞爾

戴恭人權厝志

劉履芬

恭人姓戴氏字杏枝上元人也出秣陵之允適吳趨之里
蔣侯之妹第三謝公之女最小瑤資煙茁玉質花韶不愛
焚香自工織素德容畢備智慧聿超年十九來歸侍我母
朱太恭人愉聲問寢怡色承顏鵲鬢龍媼悉煦其春和韭
苳梅蘇無閒于夕饋時予家遇屯邅意境怫鬱寫盤中之
曲商氣潛盈祕枕中之書干時易忤咸豐辛亥予赴武林
而恭人病于室手爪痿弱膝踝僨輿可匿鉤弋之拳幾廢
邯鄲之步寢疾就瘡兵戈漸起至如石湖泛月虎阜看花
雖偪烽煙猶載家室迄今思之殆隔世事矣予窘于家食
薄游京邸誦太學之書課農曹之算六年羈旅兩地離愁

錦字斷于胥江雁行折于中道南轅北馬不傳樂土之詩
燕樹吳雲祇益無家之慟庚申夏秋予遘英夷家經髮逆
航海南行始重逢于滬上纏織女之機絲買珠已罄傷昆
明之劫火浮梗都非復走崇川繼遷袁浦投班生之筆移
葛令之家風鶴頻傳轍鮒無恙猶得筆安翡翠匣妥琉璃
亂後所遭此爲最適恭人未嘗孕育妾平甲子夏始舉一
女三歲而殤嗣是吳門待闕重理扁舟阿侯入抱仍添側
果而乃鏡牀繡檻經行瓦礫之堆蘭姊瓊姨都入幽冥之
錄問旅食而生塵嗟宦途之似海淒涼百歲憔悴一宮悲
可知已病亦深焉去秋以腫懣謁醫藥裹罕效除夕設祭
拜不能興今春二月十九日加午奄然遂逝腹臘之祝冀

閔于先靈華鬢之延莫逢乎今日越月厝于吳縣橫塘會
仙橋之原權也春蘭悴而罷溫秋蟾晦而失照孟漿致奠
愁聞煙絮之呼錦簾猶存忍誦蒙楚之什貲俸錢之十萬
何日方償瘞深恨于九泉他生未卜江南塞北天上人間
嗚呼

張玉珊行藥集序

褚榮槐

行藥集者玉珊自題其病中詩草也其友褚榮槐讀而歎曰嗚呼盧照鄰病梨之賦劉公幹清漳之詩勞者善歌文人多悴固如是乎憶夫秋心乍感別緒俄催濛濛細雨之天寂寂重簾之地山巨源之高會袖出新詞嵇叔夜之不逢門題凡鳥時實七月下旬也其明日君放潏川之櫂海水迷天僕游明聖之湖越山隔岸名疆利鎖同呼如願之神葉晚花初並有加餐之字比予畢試而來歸君已抱疴之甚劇靈通范式幾危元伯故人疾問維摩只有文殊菩薩斯時也帳垂漠漠樓寂沈沈窗不風而自關鐙未宵而已暗沈家令腰圍瘦盡憔悴可知屈左徒面目改常支離

殊甚顧猶蟬聲辛苦不解斷腸鶴翅瓊瓊難忘學舞元微
之之起坐詩寄香山楚太子之隱憂客求枚叔爾乃攜將
矮几擘就蠻箋結習難除吟懷未耗馬長卿四壁閒居何
堪消渴習鑿齒半人爲號不廢著書或驚蟋蟀之吟或問
參苓之價或良朋書至挑鐙舒壹鬱之思或索稿人來扶
枕寫欹斜之款或和爭強韻一鑪之藥火猶紅或拈得新
題半榻之茶煙正綠夢回老母聞枕上之哦聲立倦雛鬟
拾牀頭之賸稿凡少陵病肺之時皆昌谷嘔心之句蓋君
之臥疾也閱一百卅日其得詩也約五十餘篇可謂樂此
不疲溺於所好者矣嗟乎阿灰善怨平子工愁蓋次公何
必酒狂王伯輿當爲情死飛龍落店每聞懊惱之歌獨蛹

抽絲大有纏絲之致既嘿嘿以三年復茫茫而百感學琴
永叔幾時驗蠲忿之方荷鋪劉伶何處得埋憂之地況復
枝頭窮鳥肆上枯魚乞米成書收錢賣畫牽張融岸上之
舟指庾信賦中之樹鳥嘯花笑時時彈鋏之悲朝鑒暮鹽
歲歲諺臺之客天奪柳州之巧杳渺雙星鬼哀韓愈之窮
挪揄三揖宜其惆悵絕多蕭騷不已也然而劒鋒盡缺已
非繞指之柔壺口新殘空著責頭之喻飢來驅我陶靖節
之生平憂能傷人盛孝章之身世才如王粲不慣離鄉貧
甚茅容終能養母雖云秋士多悲總賴達人知命澆來魯
酒便足銷愁投去蓮驍頻看索笑桓子野歌聞江上清笛
三聲石季倫樹碎園中珊瑚十丈何必明遠蒼涼敬通軾

軻拜憤王之廟彈琴而淚欲承睚居愁女之城倚柱而聲
偏蕩魄哉君曰有諸斯言良是羊叔子不若銅雀妓事屬
不平劉季和何如荀令君聞之遁走言哀已歎願此後母
爲變徵之音來日大難但明年示我移居之集

國朝駢體正宗續編卷六

受業高安鄒淩瀚校